

Date – 10/01/2026

Time - 7:30 -7:40 Hrs

AKASHVANI AIZAWL  
REGIONAL NEWS BULLETIN  
HEADLINES (MORNING)

1. Agriculture Minister Pu PC Vanlalruatan thla thar February ni 2 atangin sawhthing an lei tan leh dawn tih a sawi.
2. Commerce & Industries Minister Pu F Rodingliana hovin Lengte a Export Promotion & Industrial Park (EPIP) tih changtlunna tura hmalakna kal mekte endik a ni.
3. Parliament Budget Session chu tun thla January ni 28 ah tan a ni dawn.
4. Union Home Minister Amit Shaha chuan nimin khan National IED Data Management System (NIDMS) internet kaltlangin a hawng

<><><>

AGRI MINISTER

Agriculture Minister Pu PC Vanlalruatan nimin khan Kolasib District chung Kawnpui ram a Serlui kam Huan leh Thlasik thlai chinna hmun a tlawh.

Minister chuan, sorkar-in kuthnathawktute tana hamthatna a siam, Support Price a pekna te chu Kolasib District-a kuthnathawktute pawhin chhawr tangkai leh zual se a duh thu a sawi a, Sawhthing pawh thla thar February ni 2 atanga an lei tan leh tur thu a sawi baw. Minister chuan, thlai hmun siamtuten a panna kawng lama harsatna an tawh chu hmalak a ngaih thu a sawi a, Department lam pawhin a theih ang angin hma an la mek tih a sawi baw.

Serlui kam tawn ah hian Huan nghet leh Thlasik thlai chingtu chungkua tam tak te chuan eizawna lian tham tak an kalpui mek a, kum 3 kalta atang khan KVK Kolasib leh Horticulture Deptt te nen Thlai chingtute an chhawmdawl a. Thlai chi thar enchhin nan pawh an hman mek a ni.

Pu Joseph Lalnuntluanga, DAO, Kolasib chuan Serlui Zau-a thlai chingtute chu Zau dang nena khaikhin chuan chungkua tam lo mahse, an thlai thar te chu leitha leh Chemical dang hman lo anih avangin a thianghlim bik tih a sawi a; Thingdawl-a Alu chi siamna hawn a nih tawh avangin Serlui Zau-in chin an chak em em chu an pek thui tur thu a sawi.

Agriculture Department hotute tarlan danin, nikum chhung khan Kolasib District-ah Sawhthing Qntl 3600 hralh a ni a, kuminah hian Qntl 6000 vel thar theih an in beisei a ni. Buh hum pawh Kg-ah Rs 30-in Buhchangphai-ah lei mek a ni bawk.

He hunah hian Village Council leh ZPM Party hruaitute chuan kuthnathawktuten hlawk zawka Serlui kam hausakna an chhawr theih nana an ngaih pawimawh te an lo thlen bawk.

Minister hi Agriculture Department leh Horticulture Department hotute bakah ZPM Party hruaituten an tawiawm a; thlai chinna hmun te an tlawh nghal bawk.



#### PWD MINISTER

PWD Minister Pu Vanlalhlana tun thal chhung hian Aizawl bakah Mizoram District khawpui dang kawngpui pawh siam that hman an tum tih a sawi.

Akashvani News Aizawl zawhna chhangin Minister chuan, tunlai hian Aizawl khawpui kawngpui lian laite chu ngawrh taka siam mek a ni tih a sawi a, an duhthusam leh sawisel bo ni nghal vek lo mah se an thei tawka thain an siam tih sawiin, Aizawl bakah hian District Headquarters dangte pawh siam that mek niin, fur ruah tui tlak hmain zawh ngei an tum tih a sawi bawk a. Heng bakah hian khaw hrang hrang kawng pawh siam tura hmalak a nih thu a sawi bawk.

PWD Minister hian hmabak an la ngah hle tih a sawi a, hma an lak mena zingah KTP General Conference thleng tur Saitual khawpui chhung kawngpui te chu inkhawmpui thlen hma ngei siam zawh an tum tih a sawi. Pu Vanlalhlana chuan, inkhawm denchhen a siam a nihna kha a pawimawh a, inkhawmpui hnu lama siam ai chuan a tan hma ngeia siam kha kan tum dan a ni, a ti bawk.

Mizoram kawngpui hrang hrang te siam mek a ni a, a bik takin khawpui chhung kawngpui te chu zanah siam thin niin Aizawl khaw chhung siam vanga kawngpui dan lailawk pawh a awm ve thin a ni.



#### POWER MINISTER

Commerce & Industries Minister Pu F Rodingliana hovin nimin khan Department hrang hrang hotute chian Lengte a awm Export Promotion & Industrial Park (EPIP) an tlawh a, industrial area tih changtlunna tura hmalakna kal mekte an en dik.

Commerce & Industries Department, Land Revenue & Settlement Department, PWD leh P&E Department hotute, khawl hmanga a hmunhma zirchianna, Geographic Information System (GIS) mapping leh a ramri tehfel (re-plotting) hna kalpui zawh tak zulzuia Industry hrang hrang rem (Allocation) dan tur ruahmanna siamte an en ho nghal a.

EPIP Lengte hi industry dinna turin kum 2003 khan ruahmanna siam a lo ni tawh a. Industrial Park siamna tur hian mimal ram 155 lak a ni a, he hmun zau zawng hi bigha 1390.22 a ni. Minister Pu F. Rodingliana hova EPIP Lengte endikna hun a

tarlan danin industry dinna tura ram lak fel tawh chhungah mi thenkhatte chuan hmun engemaw zah an la enkawl zui a. Mizoram chhunga Industry tih hmasawn nana ruahmanna awmte sawt zawka kalpui a nih theih nan dan lova ram la enkawl zui luite Pass chu rang taka cancel a tul an ti.

EPIP Lengte chhunga ruahmanna mumal leh felfai kalpui a nih theih nan Industry-te thil siamchhuah azirin a hlawma an awm zel theih nan, PWD Chief Architect enpuina hnuaiah GIS mapping leh re-plotting hna zawh fel tawh pawh C&I Minister ho hian a taka kalpui dan tur an enho nghal bawk a ni.

Minister hian 132 kV Sihhmui Sub-Station atanga EPIP Lengte chhunga industrial unit-te, a bik taka power supply pekna tur chu en nghalin, EPIP Lengte chhunga kawlphehtha thlun dan mumal taka siam leh a tih changtlun zelna tura hmun awl zuah a pawimawh thu a sawi.



### G-RAM-G

Ni 100 inhlawhna MGNREGA thlakna tur Viksit Bharat-Guarantee for Rozgar and Ajeevika Mission (Gramin) (VB-G RAM G) Act, 2025 chungchang inhrilhhriatna chu nimin khan District thenkhatah neih a ni a,

Nimin zingkar khan Champhai Vengsang YMA Hall ah VC te kaihhruiainain Vikshit Bharat G RAM G Bill chungchang inzirtirna hun hman a ni a, he hunah hian Job card nei atangin chhungkaw aiawh pakhat zel an kalkhawm a ni.

Khawzawl RD Block huamchhunga Village Council hrang hrangah nimin vek khan G-Ram-G inzirtirna neih a ni a. VB-G RAM G Act hi Lok Sabha chuan nikum December ni 16 khan an Pass a, hemi chungchang mipuite hrilhhriatna chu nikum December ni 23 khan rampumah neih tura tih ni mahse Mizoram-ah erawh hunpui lai a nih avangin a hun sawn hlat a ni.

Khawzawl RD Block huamchhung Special Gram Sabha ah hian Khawzawl RD Department Staff te chu inthendarhin VC hrang hrangah VB-G RAM G Act chungchang chu MGNREGS Job Card Holder te hnenah hrilhhriatna an nei a, hetah hian zawhna leh chhanna hun te buatsaih nghal a ni.

Chawngte RD Block huamchhung tan pawh Kamalanagar-III YCA Hall-ah Vikshit Bharat-G RAM G inzirtirna hi neih a ni a, job card nei chhungkaw zinga pakhat zelin he hun hi an chhim a ni.



## LADC

Lai Autonomous District Council ah hun rei tak chhung sawrkar mumal a din theihloh hnuah nimin khan MNF leh Congress Party in United Legislature Party dinin Larsap hnenah sawrkarna an siam theih thu an thlen.

Member 8 nei MNF leh Member 7 nei Congress ten an din United Legislature Party ah hian an hruaitu atan MNF Member, Lawngtlai Chandmary bialtu MDC, Pu C.Lalsawmzuala an thlanga, Pu C. Lalsawmzuala hian LADC ah Sorkarna a siamtheih thu leh thlawptu a ngah tawk thu Larsap ah hian thlenin, Governor chhanna ngaihchan mek a ni.

Puan tawh angin LADC ah hian Bial 25 awm ah MNF in bial riat lain, Indian National Congress in Bial sarih, Zoram Peoples Movement in bial ruk an la a, BJP leh Independent ten bial hnih ve ve an la bawk.

Inthlan Result hriatfel a nih hnuah Inthlan laia thawk dun MNF leh Congress thawhdunna chu Congress in chhu chatin, ZPM leh Congress chuan thawhdun tumin hma an la a, ZPM Thuneitu sanglamin thawh dun an remtih loh vangin, ZPM leh MNF chuan thawh dunna tur thui tak kal puiin Sorkar ruangam tur pawh siamfelin, December 15 khan an hruaitu ZPM Member Pu T. Zakunga chuan Governor hnen ah Sorkar a siamtheih thu a thlen a, Larsap atanga chhanna ngaihchan a nih laiin tun thla Ni 6 khan MNF General Hqrs chuan ZPM nen an thawhdunna an chhu chat a, LADC ah Sorkarna siamtura indawrna a kal kual mek laiin, MNF leh Congress chuan United Legislature Party dinin, Sorkarna siam tumin hma an la leh mek a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## REFUGE (HIV)

Myanmar atanga Mizorama raltlan rawn lutte chu HIV/AIDS endik thin an ni a, hri kai te pawh enkawl thin an ni tih Mizoram State Aids Control Society (MSACS) hotute chuan an sawi.

MSACS Joint Director Dr Richard Chawngthu (CST) chuan, a tul anga hri kai leh kai lo endik an nih thu leh, tun hmam harsatna a awm avangin tunah chuan a hrana buaipui an nih thu a sawi bawk.

MSACS Director Dr Jane Rinsangi Ralte pawhin, raltlan ten HIV/AIDS an test duh emaw, a enkawl na an la duh emaw a nih chuan an inhawngin hma an la mek tih a

sawi a. National AIDS Control Organisation (NACO) hnenah an hrilh vek tih a sawi bawk.



### HNAHTHIAL

Hnahthial-a Excise & Narcotics Deptt thawktute chuan kum kalta 2025 chhung khan Rakzu litre 4155 vel manin Zu bilh lai tin 25 an man bawk. Sap zu umpuitling 32 leh Beer can 74 an man a, Zu khapna dan MLP Act hnuai thubuai 192 ziak lutin henga inhnamhnawih mi 189 an man bawk a ni.

Hemi hun chhung vek hian END Hnahthial in Khuh damdawi bur 558, Ganja 70 grams leh Heroin 321 grams an man bawk a ni. ND&PS Act hnuai thubuai 4 ziak lutin mihring 5 an man a ni.



### HNAHSIN KUT

Champhai Nature Conservancy (CNC) Executive Committee, kumin a thutkhawm hmasa ber, Champhai Zotlang a neih ah chuan kumin Favang ah a tum thumna atan Hnahsin Kut buatsaih leh nise an ti a, hemi atan hian Organising Committee a rang lama siam a, hma lak zui nghal nise an ti.

He Committee, an President, Dr Sammy Laldinthara kaihhruai hian an pawl chhung inrelbawl na bakah kumin chhunga an hma lak dan turte an relho nghal a. Ramsa leh nungcha humhalhna kawngah ngawrh zawka hmalak nise an tih bakah Champhai leilet zawl venghima, a hlutna ti thar tura hmalak zel nise, an ti bawk.



### PARLIAMENT

Parliament Budget Session chu tun thla January ni 28 ah tan a ni dawn. Union Parliamentary Affairs Minister Kiren Rijiju chuan session chungchang hi social media lamah tarlangin April ni 2 thleng a awl dawn a ti a. Thawh hniha neih tur niin thawh khatna hi thlaleh February ni 13 ah a zo ang a, thawh hnihna hi March ni 9 ah tan a ni ang a ti bawk. Pu Rijiju chuan President Droupadi Murmu-i chuan sawrkar rawtna angain Parliament House pahnih Budget session 2026 hi a pawmpui thu a sawi bawk a ni..



## UNION HM

Union Home Minister Amit Shaha chuan nimin khan National IED Data Management System (NIDMS) internet kaltlangin a hawng. He thil thar hmang hian ramchhunga tualchher bpmb IED lo manchhuah kawngah nasa zawkin sawrkar tha a ti chak dawn a. Ramchhung himna atan pawh a pawimawh hle dawn a ni. Thusawiin Pu Shaha chuan ramchhunga venhim hna thawktu hrang hrante thlunkhawmna hna pawh he system thar avang hian a awlsam lehzial dawn tih a sawi a. A hun leh hmun dik takah thu pawimawh inhrilh theihna tur a ni a ti bawk. NIDMS hi National Security Gaurd (NSG) siam a ni.

